

Hist. 6592.



BIBLIOTHECA  
UNIVERSITATIS  
CRACOVENSIS

Mag. St. Dn

6592


val. kontp

HISTORIA

I

*Juris publici Europaei de Samae Regni  
Statu Epistola prima ad Nobilem  
quendam Germanum 1659.*







JURIS PUBLICI  
EUROPÆI  
*De*  
DANIÆ REGNI  
STATU

EPISTOLA PRIMA

Ad Nobilem quendam Germanum.

Anno M DC LIX.



## Typographus Lectori.

CUM res tædij plena sit pro cognoscendo statu regnorum atque provinciarum Europæ diffusa & proluxa volumina pervolvere, quibus plerumq; aliena immiscentur, sæpè etiam ea defunt, quæ à proximis bellis & vicissitudinibus, vel aliis ex causis immutata deprehendimus; operæ pretium me facturum esse existimavi, si jus publicum Europæum aliquot Epistolis comprehensum tibi exhiberem, cujus specimen erit Daniæ regni brevis descriptio, quod hodiè cùm primis in theatro est, & belli calamitates experitur. Neq; enim jus publicum in sola Imperij Germanici notitia consistit; Habent etiam reliqua regna leges Statûs, adeòque jus publicum, quod pro gentium moribus & institutis à se invicem diversum est. Singula liberè sed ex fide optimorum historicorum & scribentis experientia proposita invenies, omnia tamen absque injuria cujuscunque, quod hîc semel dixisse sufficiat: Tu hisce conatibus fave & vale feliciter.





Juris publici Europæi  
*De*  
DANIÆ REGNI STATU.

EPISTOLA PRIMA

Ad Nobilem quendam Germanum.



*Æpè à me petiisti, Vir Nobilissime, ut ea quæ ad  
statum regnorum atq; provinciarum Europæ  
pertinent, breviter & succinctè perscriberem,  
quibus precibus cum hucusq; propter alia atq;  
alia impedimēta satisfacere non potuerim, jam  
demum liberabo fidem meam, & à Daniæ re-  
gno ex ordiar, quod inter Europæa maritimum & magni momenti  
est. Hujus regni Sceptra hæreditaria non sunt, plerumq; tamen  
electionis jure transferuntur ad primogenitum Regis, qui juxta  
certam capitulationem in Coronatione Ordinibus regni antiqua  
privilegia & receptas consuetudines jurejurando confirmat. No-  
vum Regem Episcopus Zeelandiæ Roschildensis inungit, cui Sena-  
tores Coronam imponunt Hafniæ sive Copenhagij in templo beatæ  
Virginis Mariæ. Tangit hoc Io. Sleidanus in Illustr. Hist. Phi-  
lippi Cominæ. Dania maioribus utitur privilegiis: Nam  
etiamsi multi sint filij regis, jure tamen successionis ad  
principatum ex ijs nemo admittitur, & totum ex arbitrio  
Procerum ac Ordinum pendet, sicut ipsorum et scripta te-  
stantur.*



stantur. A Christiani si-ve, ut Dani loquuntur, Christierni. I. temporibus, qui ex illustri familia Comitum Oldenburgensium anno 1448. regno præfectus est, nemo ex filiis vel agnatis Regum præteritus legitur. Nostro seculo Christianus IV. autoritate suâ effecit, ut ipso vivo filius primogenitus pro successore declaratus fuerit, qui tamen ante patris obitum vitâ functus est, aded, ut rerum summa ex unanimi Procerum consensu ad ejus fratrem, Fridericum III quondam Archiepiscopum Bremensem, pervenerit. Talis Regis primogenitus regno destinatus & communi Senatorum suffragio electus peculiari nomine Princeps appellatur: reliquis fratribus Ducum & Hæredum Norvvegiæ titulus tribuitur.

Norvvegici Regni, quod Danico ultra duo secula per matrimonium Reginae Margaretae cum Haquino Rege Norvvegiæ conjunctum fuit, aliaratio est; Possident hoc moderni Reges lineæ Oldenburgicæ pro hæreditario, ut his deficientibus ad Holsatiæ Duces devolvatur, qui omnes Regni Norvvegici Hæredes in titulis sese profitentur. Forma regiminis commoda & pro gentis moribus apta satis est, universis provinciis in certas præfecturas Danicè Herit distinctis, quibus præsunt judices legum Danicarum periti; Neq; enim ex jure Iustiniano vel Canonibus Pontificiis deciduntur subditorum controversiæ, sed ex solo Corpore legum Danicarum, quod jussu Waldemari I. Regis compilatum perhibetur, ideoq; pro Iureconsultis & Advocatis sterilis vel nulla propemodum in hoc regno messis est, cum omnia ex patriis legibus dependeant. Ex omnibus

pro-



5

provinciis atque insulis ad Regni Cancellarium appellare licet, si  
lata sententia videatur habere aliquid iniquitatis, postea ad ipsum  
Regem & Regni Senatam provocatur. Superioribus seculis  
bello maximè celebris fuit Danica natio, aded ut Suecis, Anglis,  
Scotis, Irlandis, vicinisq; populis sæpius imperaverit, Suecos ta-  
men vice versâ Daniæ exercitus in diversis præliis superasse, atq;  
universum regnum aliquando sibi subjecisse certum est. Ex va-  
rio atq; inconstanti hoc regimine, dum uterq; populus præteritorum  
memoriam non facile potuit deponere, natum esse conjicio matuum  
odium harum gentium, quod etiamnum durat, ut hac in parte à  
Gallis & Hispanis parum differant. Enim verò non semper li-  
bera, sed quondam Imperio Romano Germanico subiecta fuit Dania,  
aded ut toto Ottonum tempore Cæsaribus fidelitatem & homagium  
præstiterit. Petrus, Daniæ Princeps à Friderico I. Imperatore  
Coronam & Regij honoris <sup>à Gregorio</sup> eâ lege consecutus est, ut fiduciarium  
se Imperij Germanici profiteretur; Sed in hoc graviter ipsum pec-  
casse censet alicubi Bodinus, cujus verbis non pigebit recitare ex  
cap. 6. Method. Histor. Imperij Danici conversiones: Eodem  
tempore, quo Pyastus in Polonia, Carolus Magnus in Gal-  
lia, Nicephorus in Græcia Imperium inierunt, simul quo-  
que Gotricus Daniæ regnum armis ac legibus stabilivit, ab  
eoque ad Nubam (error est, Gormonem III. Gamle appella-  
tum voluit dicere) regnatū est annos 140. tum Henricus Au-  
ceps, Imperator Germanorū, regnum illud in provinciæ  
formā redegit, sed cum ab Imperio postea à Dani descivisset,



rursus ab Ottone victi sunt, atque iterum rebellarunt Sue-  
none Rege, qui à Waldemaro fratre ejectus est, à quo re-  
gnum successione delatum est anno post 211. ad Margare-  
tham, quæ Daniæ, Sueciæ ac Norvvegiæ præfuit Imperiis,  
& quæ Pomeraniæ Ducem (*Ericum X.*) adoptavit, trige-  
simo quinto post anno Engelbertus à Danis deficiens Sue-  
ciæ regnum invasit, quod postea civili seditione coactus  
reliquit; Rursus triplex illud regnum unius Imperio Ba-  
vari (*Christophori III. Bavarie Ducis*) paruit; Post hunc Chri-  
stianus I. electus est, à quo cæteri consequentes ad hæc usq;  
tēpora imperarunt, *Hic est ille Gotricus seu Gothofredus qui Ca-  
roli Magni adventu & armis perterritus insigne vallum Dane-  
vvircke, cujus hodieque supersunt vestigia, prope Slesvicum anno  
quasi 808. excitavit, quod à subsequentibus Regibus ad versus ho-  
stium incursiones non semel restauratum est.*

Hodiè, excepto Holsatiæ Ducatu, Rex sui juris est, & neminem  
recognoscit superiorem; In hoc regno complures sunt nobilium fa-  
milie illustres & per antiquæ, sanè Urorum nomen extat in ve-  
tustissimis documentis, quæ ad Caroli Magni tempora pertingunt.

Non pauci bonis literis dederunt operam egregiè, inter quos  
eminet Tycho Braheus, rerum Astronomicarum solertissimus Inda-  
gator, qui in Huena insula freti Danici maximo commodo Reipubl.  
plurima antiquis & recentioribus incognita produxit in lucem, ut  
propter exquisitam hanc peritiam Rudolpho Cæsari gratissimus fue-  
rit. Nulli Duces, Comites vel Barones in hoc regno reperiuntur,  
cùm nemo sublimiorem dignitatem affectet, sed omnes sola Nobili-



tate contenti vivant, quorum bona in universum hereditaria, neque ullâ feudali qualitate affecta sunt. Lege Imperij prohibetur Rex talia sibi comparare à Nobilibus, ne inter ipsum & Regni proceres ex hac causa lites & controversiæ nascantur. Ea autem prædia, quæ Danica voce **Verlehungen** appellantur, quasi ex privilegio Nationis à Rege concedi solent Nobilibus de Republ. benè meritis ad vitam vel certos annos duntaxat. Observarunt Politici proventus Coronæ hoc modo valdè imminui, cum Rex de prædiis istis non disponat liberè, sed teneatur ea conferre Nobilibus, qui magnâ parte reddituum sibi retenta certam summam ærario exhibent. Universi Regni Danici Senatus, qui ex viginti octo Nobilibus constat, propter Regis præsentiam pro expediendis negotiis Status perpetuò est in Hafniensi civitate, atq; hi Senatores maximâ pollent authoritate ab aliquot sæculis, adeò ut Rex absq; illorum consensu neque fœdera cum exteris inire, neque bella aliis inferre, neque quicquam à bonis Coronæ alienare, neque antiquas leges immutare, neque tributum à subditis possit exigere. Peculiaribus etiam Constitutionibus cautum est, ut magni alicujus criminis accusator non nisi observatis certis quibusdam solennitatibus condemnare queat; Illi ipsi Senatores habent beneficio Regum peculiare arces & agros, ex quibus redditibus tenentur alere certum equitum numerum, & Regi, cum opus est, in subsidium submittere. Ad hunc nobilium ordinem referendi sunt Equites Aurati, qui è collo suspensum gerunt Elephantem, gemmis & lapillis pretiosis exornatum, cujus dignitatis origo non admodum vetusta est.



*Clerum Danicum constituunt Archiepiscopus Lundensis in*  
*Sconia & nonnulli alij Episcopi, Roschildensis scilicet in Zeelan-*  
*dia, Odenseensis in Funia, Falstria, Langelandia aliisq; minorib. in*  
*sulis, Ripensis, Arnhusanus, Wiburgensis, Alburgensis & Slesvicensis*  
*in utraq; Iutia, Septentrionali & Meridionali, qui in suis dioc-*  
*cesibus vix majori potestate utuntur, quàm Superintendentes E-*  
*angelicorum in Germania. Antiquissimis temporibus longè ante*  
*receptam Augustanam Confessionem, quod sub Friderico I. factum*  
*est, soli Reges, sicut hodieque fit in Gallia, Episcopatus, & Prælatu-*  
*ras absque consensu Pontificum Romanorum contulerunt; In ri-*  
*tibus sacris sequuntur Dani Ecclesias inferioris Saxonie, quorum*  
*locorum Episcopi Christianam religionem terris hisce primi intule-*  
*runt, sicut apparet ex vita & rebus gestis S. Ansgarij, quem de vi-*  
*ctis Saxonibus Carolus Magnus summa cum potestate Septentrio-*  
*ni & Ecclesiæ Hamburgensi præfecit. Olaus Wormius lib. 1. Fa-*  
*storum Dan. cap. 9. Historias gentis nostræ fide dignas si e-*  
*volverimus, reformationis fundamenta jacta esse anno*  
*Domini 826. memorant pleræque. Circa id enim tem-*  
*poris, teste Crantzio, Haraldus IV. dictus Klack, qui à*  
*Regnero in exilium pulsus à Ludovico Imperatore hac*  
*conditione restituendus erat, ut abrogato Idolorum cul-*  
*tu, vero Deo & Christo nomen daret, reformationis ne-*  
*gotium aggressus est. Permisti Christianis in Dania manserunt*  
*Ethnici ad Imperium Haraldî Blatandi ultra annos 160.*  
*Henricus Alstedius in Chronol. conversionis populorum ad annum*  
*989. In Dania, inquit, superstitiones Ethnicæ prorsus ex-*  
*tirpantur Haraldò V. regnante, ante cujus tempora Dani*  
*pleri-*



periq; promiscuè religionem Christianam & Ethnicam colebant.

Habet Dania duas Academias sive Scholas majores, Hafniensem, quæ anno 1478. à Christiano 1. consentiente Sixto IV. Pont. Max. erecta est, & Equestrem Soranam in eadem Zeelandia, quam maximè pro Nobilibus Danicis, ut equis armis quæ tractandis assuefierent, Christianus IV. instituit. Daniæ Regnum, extra Norvegiam, Islandiam, Groenlandiæ partem cognitam, multis magnisque provinciis continetur, Scandia, insulis maris Balthici & Cimbrica Chersoneso sive Futlandia, quam veteres Daniam Cismarinam appellarunt. Quicquidenim Daniæ Reges in Holsatiæ Ducatu possident, hoc omne ab Imperio Germanico in feudum recognoscunt. Regni Norvegici metropolis est Drunthemium, civitas quondam sede Archiepiscopali celebris, qui districtus cum Bahusio, fortalitiopene in expugnabili, in nupera Transactione Roschildensi anno 1658. die 29. Februarij, Carolo Gustavo, Sueciæ Regi, concessus est. Reliqua regni Norvegici etiamnum parent Daniæ Regi cum Berga civitate, quam mercatores Hansæ. Teutonice frequentant, imprimis pro coëmendis piscibus ex genere asellorum vento & frigore induratis. Ante paucos annos in hoc regno reperta sunt venæ argenti divites sanè & puriores, quàm alibi in Europa. Rex in fodinis utitur servitio rusticorum, à quibus plures alias occultari verisimile est, ne ipsorum operæ augeantur. Ex Nerigone, seu Norvegia, navigari in Thulen, hoc est, ultimam insularum Britannicarum Romanis cognitam, tot retro seculis Plinius tradidit. Hodierna Islandia, à perpetua glacie & immensis frigoribus ita dicta, Thule remotior est, quæ Norvegiæ regno an-



101260. accessit. Diu neglectam & ante annum 874. à nulla gente inhabitatam fuisse reperio.

Incolæ ex sulphuris copia magnum lucrum capiunt, quam suppeditat Hecla mons, cum Vesuvio hac in parte comparandus. In Norvegiæ Daniæ Rex Proregem seu Vicarium ex præcipua nobilitate ad aliquot annos, in Islandiam verò quotannis mittit Gubernatorem pro colligendis redditibus.

Groenlandiæ partem cognitam ad Danos pertinere indubitatum est: Mare contiguum ex balenarum captura innotuit; Haec enus detectum non est, insula, an terra continens sit cum America, ulterioribus navigationibus impeditis propter mare glaciale. Scandia omnis, id est, Hallandia, Sconia, propriè sic dicta, & Blekingia olim Daniæ, nunc per tractatum Roschildensem Sueciæ jurisdictionis est. Ex harum provinciarum portibus, ad mare Balticum positis, & præcipuè ex castello Elsenburgensi, navigationibus per Sundum seu fretum Danicum maximo impedimento esse potest Sueciæ Rex, postquam in opposito littore Cronenburgum occupavit, arcem fortissimam, & à Friderico II. Daniæ Rege, magnis sumptibus adversus immanes pelagi fluctus extructam, ubi promontoria Sconicæ & Zeelandiæ tam propè cœunt, ut vix parvi milliarii spatium inter se relinquant, idèoque na ves huc trans-euntentes propter usum maris in vicina Civitate Helsingora telonium pendunt Regibus, quod minora navigia, si per sinum Balticum inter Zeelandiam & Funiæ iter instituant, Nyburgi tenentur solvere.

Ex hoc



Ex hoc freto Oresundico pendent multorum ora præcipuè in Belgio fœderato, cujus subditis transitus per has angustias necessarius omninò est, propter annonam, aliasq; merces, quas ex Dania, Suecia, Livonia, Polonia, Prussia, Pomerania, aliisq; circumjacentibus provinciis in Patriam deferunt. Dominium maris Balthici Danicæ Reges sibi tribuunt, idq; ad Prussiæ, vicinæque littora extendunt. Peculiari libello id demonstratum est, cum naves Polonicæ, quæ per Spiringium à Dantiscanis vectigal exigebant, anno 1637. Hafniam jussu Christiani IV. captivæ abducerentur, qui anno sequenti die 13. Januarij Vladislao IV. Poloniæ Regi inter alia rescripsit. Paulò post mercatorum & nautarum quærelæ gravissimæ ad nos deferebantur, qui, commercia funditus tolli, se fortunis omnibus everti querebantur, & ea propter auxilium nostrum, cum nobis ob supremum dominium maris Balthici protectio commerciorum incumberet, suppliciter implorabant. Cæterum ad defendendum mare Balthicum & præcipuè fretum Oresundicum Danicæ Reges, etiam in maximis periculis constituti, non facile admiserunt vicinorum auxilia & suppetias. Ex hoc principio Status Christianum IV. Regem prudentissimum noluisse recipere auxiliares copias Hollandorum, cum Cæsareani in insulis Danicis proximi universam lutiam obtinerent, annotavit Carolus Carafa, Nuntius Apostolicus in Germania Sacra Restaurata p. 380. edit. Francof. Desperatam Daniæ plagam miserantes Hollandi præcipuè Amstelodamenses, quib. felicioris fortunæ spes ex interitu Daniæ decidebat, omnem moverunt lapidè, ut mole



sua collabescentem sortem sociorum erigerent; quo mare Balthicum & Suevicum, ubi celeberrima ac creberrima sua habent emporia, servarent. Quare plures naves armarunt, & per eorum Legatum, Laurentium Realem, quondam in Indiis maris Praefectum, praesidia duorum millium sclopetariorum Regi Daniæ, eorum impendiis alendorum, obtulerunt, per quos ipse angustiis Sundæ consuleret, ne ipsis aditus in Poloniam, Prussiam, Rugiam & Sueciam præcluderetur ab Austriacis & Hispanis (quod maximè cavendum arbitrati sunt) insuper & alios quatuor mille (Regi tamen merentes) submittere promiserunt. Sed Rex, paulò amplius fidei Hollandorum concedens quàm Cæsareanorum, tam gravia praesidia recusavit, fretumq; Sundianum suis praesidiis munire contentus, promissas auxiliares copias alibi quidem collocandas non detrectavit, Sundâ verò illas exclusit; Nam verebatur, ne, si semel tam potentes hospites admitteret, etiam ab ipsis non minùs quàm Cæsareis suo præcipuo comodo præcipuoq; fortalitia destitueretur.

*Insularum maris Balthici maxima est Zeelandia. Hujus & totius regni caput est Hafnia, sedes Regum cum adjacenti insula Amacka, quæ portum efficit maximè securum. Secunda civitas ibi est Roschildia, sepulchris Regum & proximâ pace inter Monarchas Septentrionales illustris. Quidam putant, Hollandos, Zeelandosq; Batavorum ex hac Zeelandia & Hallandia Sconiæ habere originem suam, quo inclinat vir doctissimus Hadr. In-*

*nus*



nus, ipse Belga, quod nos in medio relinquimus. Sequitur Funia, frumenti aliarumq; rerum feracissima insula: per mare, quod Funiam à Zeelandia separat, & Balthici pars est, eodem modo, ut per fretum Oresundicum, sed propter scopulos majori cum periculo, navigari potest in Sueciam, Poloniam, Prussiam.

Prioribus proximæ sunt Langelandia, à longiori forma sic dicta, Falstria, Tøssinga, aliæque.

Gothlandia cum Oeselia Insula per pacem Bremsebroënsē à Christiani IV. Daniæ Regis tempore Suecos pro Dominis agnoscit, maritimis negotiationibus olim clarissima. Joā. Isacius Pontanus disc. Histor. lib. 2. cap. 2. Nec illud quoque silentio involvendum erat ad laudem ac celebritatem navigationis, quā præcipuè olim Dani excelluere, haud leviter pertinens, quòd nauticæ leges ac jura, ut olim apud Rhodios Rhodia huic initio præfecta fuit. Certò enim constat, in urbe Wisbicensi, quæ Gothlandiæ, maris Balthici Insulæ, metropolis est, maritimas constitutiones ac leges, quæ exinde apud alias quoq; gentes in usum adactæ, primitus fuisse constitutas. Nec id modò, sed ibidem etiam primò tabulas hydrographicas diligenti nautarum observatione annotatas, quæ postea ab aliis auctæ emendatæq; singularem usum præbuerunt navigantibus, utpote quarum beneficio cæci maris fluctus medio in oceano tutò nauta percurrat feraturque in portum propositum non longis anfractibus legendò littus, sed rectâ sæpè lineâ, si ventus ferat.



Supereſt Cimbrica Cherſoneſus, ſi-ve ſeptentrionalis & meridionalis *Futlandia*, in cujus littore, quod *Funiæ* proximum eſt, ante paucos annos *Fridericus III. Daniæ Rex* inſigne fortaliſſimum à ſuo nomine *Friderichsöde*, quaſi *Friderici angulum*, appellatum condidit, quo expugnato præteritâ hyeme *Carolus Guſta-vus, Sueciæ Rex*, per mare congelatum *Funiam, Zeelandiam, vicinasq; inſulas* cum exercitu ingreſſus eſt. Supremum *Futlandiæ Tribunal Viburgi* conſtitutum eſt pro decidendis contro-verſiſ ſinium, hæreditatum aliarumq; cauſarum ci-vilium. Huc quoq; graviora crimina, cædes, adulteria, furta & ſimilia per appellationem ab inferioribus præſectis deferuntur. Ex hac Cimbrica Cherſoneſo olim in *Britanniam* proſecti ſunt cum *Saxonibus Angli*, quale nomen certus aliquis diſtrictus *Angeln* in ducatu *Sles-vicenſi* hodieq; retinet.

Nobis, præter *Bedam* in *Historia Eccleſiaſtica lib. 1. cap. 15.* adſtipulatur *Joan. Jſacius Pontanus diſcuſs. Hiſtor. lib. 1. cap. 9.* Hic etenim ille *Egbertus* eſt, qui omnia illa diverſaque ab *Angliſ Saxonibusque* occupata ac variè diviſa *Britanniæ* regna populosque in unum coëgit. Quippe antiquato ipſius *Britanniæ* vocabulo, ut ejus generis ac gentis memoria perpetuo obtineret, ſimul ut jure uno eodemque nomine univerſus conſervaretur populus, primus *Britanniam Angliam*, ipſamque gentem ad memoriam majorum, quos ex *Cimbrica Cherſoneſo* proſectos jam ante memoravi, *Anglos* appellavit, idque ut immortum ſemperq; manſurum edicto quoque ſancitum voluit

*Ad Ju.*



*Ad Iutiam meridionalem quæ ab Eydora fluvio oppidoq;  
 Rendesburgo ad Coldungam extenditur, pertinet Ducatus Slesvi-  
 censis, qui regni Danici feudum est, & propriis juribus utitur, ut hic  
 non liceat subditis à sententiis pronunciatis extra Daniæ limites  
 ad aliud iudicium provocare. Serenissimorum Holsatiæ Ducum  
 Regentium sedes est in arce Gottorpiensi, quæ vicinum habet oppi-  
 dum Slesvicum, ubi ex testimonio Helmolli Veteris Historici pri-  
 ma Ecclesia Christiana in his partibus orbis Arctici ab Ausgario con-  
 stituta est. Reliqui Duces Holsatiæ in aliquot lineas distincti ap-  
 panagij jure Alsenam insulam aliaque loca possident. In Germa-  
 nia Daniæ Rex mediam partem universæ Holsatiæ obtinet, cu-  
 jus provinciæ Nobiles post Excessum Adolphi XIV. Comitum Holsa-  
 tiæ & Schaumburgi Christiano I. Daniæ Regi certis conditionibus  
 sese subjecerunt, qui hac occasione Ducis Holsatiæ titulum à Frider-  
 rico III. Imperatore primus accepit. In universa Holsatia, qui  
 ex Stormaria, Ditmarsia, Holsatia, propriè sic dicta, & Wagria cir-  
 ca Lubecam & Segebergam composita est, singulis sex mensibus ju-  
 dicium provinciale pro decidendis controversiis Nobilium institui-  
 tur, cui quotannis per vices, modò Daniæ Rex, modò Holsatiæ Dux  
 Regens (his indivisim parent Nobiles) præsidet, qui sæpè ipsi dis-  
 ceptionibus Advocatorum intersunt, quod aliquoties à laudatissi-  
 mo Rege Christiano IV. factum esse memini.*

*Dithmarsia seu Teutomarsia inter Storam & Eydoram, flu-  
 vios, media est. Incolæ Frisicæ originis à vitam libertatem diu  
 fortissimè propugnarunt, sed à Friderico II. Daniæ Rege, & ejus  
 sociis superati Anno 1559. hodiè quiescunt.*

*Comi-*



Comitatus Pinnenbergicus ad ripam Albis Ottone ultimo, Comite Schaumburgensi in Westphalia anno 1640. extincto à Danicæ Regibus & Holsatiæ Ducibus occupatus est, cui sese sub initium opponebat Fiscalis Imperij.

Habet præter arcem ejusdem nominis, Altena vñ vicum celebrem ante portas civitatis Hamburgensis.

Neg. hoc ignorare debes, Vir nobilissime, Danicæ Reges, & ab iis descendentes Holsatiæ Duces, tempore Caroli V. Imperatoris de utroque Comitatu, Oldenburgico & Delmenhorstano simultaneè investitos, post obitum Comitis Anthonij Güntheri æquis partibus in has provincias succedere.

Hæc de Danicæ regno, sicut volebas, pro instituti ratione breviter annotavi, proximè, si Deus vitam & otium largitus fuerit, eadem methodo Sueciæ Statum ad te perscribam.

Nolo enim in his epistolis prolixus esse & tædium tibi creare, quem scio gravissimis negotiis quotidie distrahi. Interea  
Vale feliciter.

F I N I S





0592

Biblioteka Jagiellońska



stdr0015097



